

DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
manè discutienda, in Scholis Medicorum, die Mercurii
vigesima Decembris M. DCC. XXX.

M. JOANNE-BAPTISTA MONGIN,
Consiliario, Medico Regis ordinario, Doctore Medico,
Chirurgiæ Gallicæ Professore designato, Præside. *Autore.*

An Sal, Sulphur, Aqua, & Terra Hominis principia?

I.



UI naturæ principia extra naturam ipsam quæsierunt, pro principijs ediderunt chimeras, suæ imaginationis filias. Quot retrò abiere sæcula quibus Physicorum gens, circa mixtorum principia, vix manifesti quidquam enucleavit! Elementorum quadriga, Temperamentorum mensura, idea Qualitatum, obscuræ Physices hypoteses. Hæc veluti per manus tradita opinio, omnium animos usquequod occuparet, ni Philosophi, quos vulgò Chymicos nominamus, clariora detexissent. Cave ne barbaris vocibus *Gas*, *Alkali*, *Acidæ*, decipiaris. Sequere oculationes qui in indagandis naturæ mysteriis apertiore viam tenuere. Ex omnium fermè corporum Analyti, quatuor materias sensibus planè ab invicem diversas educunt, quibus, pro variâ earum missione & proportionè, omnia naturæ corpora componuntur, suamque symmetriam & virtutes obtinent. Analyti nomine hîc loci intelligitur Anatomia seu divisio atque separatio principiorum quibus mistum constat, & in quæ resolvitur. Hæc ignis ope perficitur, cujus vehementi quo agitur motu, partes misti concutuntur, frangitur earum unio, ab invicem separantur, lingule singulis juxta suam Homogeneitatem uniuntur. Hæc operâ patent quæ prius abdita latuere. Quædam in Aquam fluunt; alia in Salem concresecunt; alia in Sulphur seu Oleum conglutinantur; alia demum in Terram revertuntur. Quæ in hac divisione, invitis artificum & labore & industriâ, ad auras avolant particulæ tenuissimæ, ab alijs residuis non sunt essentialiter dissimiles, nec aliâ ratione, quam mole differunt. Hæc quadruplex materia tantam partium subtilitatem generali motuum lege adipiscitur, ut ferè intelligentiam nostram fugiat illius subdivisio; quin tamen illâ tenuitate ipsius essentia vel mutetur vel alteretur. Ne cogites illa principia sensibus obvia, & ex mixtis educta esse simplicia aut homogenea; nova sunt mixta Sale, Sulphure, Aquâ, & Terra composita.

Ea dicuntur principia, non quòd unum ab aliorum conforrio sit absolutè liberum, sed potissimùm quia in singulis una materies cæteris prævaleat.

I I.

SOLUS Homo inter animantia, præter principia jam memorata, spiritu immortali instructus est, ut sit viva Dei imago. Hujus spiritus immortalis existentiam ratio & fides probant. Alia verò principia materialia, quibus constant Homo & universa corpora, Analysis jam demonstravit; ratio sic ea revelat. Deus Optimus Maximus, ab æterno Orbis mechanismum summâ suâ intelligentiâ perspicuè noscebat, & ex eo precisè quòd voluerit, corpora existere, ipso factò exiterunt. Hinc liquet quatuor principia Analysis evoluta, immediatâ Creatoris voluntate effecta fuisse, nequaquàm verò progressu, vel operâ legum generalium motûs; hinc iterum sequitur illa principia esse ab invicem diversa, & distincta, nec proinde unum alterius compositioni inservisse. Ne credas ergo cùm Carthesianis Philosophis, unicam tantum creatam fuisse materiam, ut ex eâ fermentationis ope, aut motuum lege, alia principia formarentur; sic procedit vulgaris artifex; per vias simpliciores, breviores, potestati suæ respondentes agit summus naturæ auctor. Ut fierent mixta, oportebat omnino ut varix essent materix heterogeneæ, quæ verbo FIAT, imperante Orbis Conditorum erupere. Nisi essent plura miscibilia, nulla fieret mixtio, neque generatio; cuncta essent Homogenea, ac proinde nullius alterationis capacia: quod maximè adversatur iis quæ in naturæ observantur operibus, ubi percipitur omnia nasci & perfici, ut sese mutuò dividant alterent quæ. Hinc Galenus libro primo de Elementis rectè ex Hippocrate scripsit: *Hominem nunquam dolere, aut saltem unico egerè medicamento, si unico Elemento, aut principio constaret; esset unius-cujusque unica naturalis affectus, ratio redeundi ad naturalem statum unica, quod experientix contrarium deprehenditur, cum infinitæ sint tum morborum, tum præsidiorum species.*

III.

PERSPECTIS sensibilibus corporum principiis, alia sensibus non obvia, quibus corpus Humanum continuò afficitur, solâ ratione investigare licet, Aërem & materiam subtilem intelligimus. Ab instanti suæ creationis principia mota fuerunt, & divisa cum eâ motûs activitate, & molis tenuitate, ultrâ quam nec plus moventur, nec dividuntur. Eadem principia ad hanc ultimam tenuitatem deducta, ab invicem sejuncta, quæ nec sensus percipiunt, nec ratio satis intelligit, id efficiunt quod Atomos, seu materiam subtilem, seu principia essentialia nominamus. Atomi, seu materia illa subtilis, velocissimo quo concitatur motu, vitam, motumque mixtis confert. Plura ex iisdem minimis principiis inter se conjuncta, corpuscula globulosa componunt elateris capacia, & valde idonea ut sonum ad aures, & lucem ad oculos deferant. Hæc corpuscula globulosa Aërem nominamus, qui tanquam medium concipitur ad infringendum velocissimum materix subtilis motum, ut actiones animalium, & vegetabilium germinationes satius & aptius perficiantur. Tandem numerus innumerabilium ferè molecularum, sive congerierum eorundem principiorum invicem conjunctarum, ea componunt principia, quæ integrantia nominamus, quæque

3

Analysis ope extrahuntur, & quæ ad corporum compositionem immediatè concurrunt.

IV.

UNICA est species Salis, Sulphuris, Aquæ, & Terræ. Aqua est materia, seu principium cujus partes essentielles ovorum modo constructæ sunt, non inter se exactè conjunctæ, sed teres atque læves; hæc ovarâ figurâ & lubricitate facillimè ab invicem separantur, & quoquò versum moventur. Aqua est tanquàm medium in quod materia tenuissima, seu atomi, vim suam exerit, ut alia principia, vel uniat, vel dividat, & ad actionem commoveat. Sal est principium, durum, rigidum, & aculeatum, in aquâ solubile, ad fermentationem excitandam, & ad corporum dissolutionem aptum; dùm salis aculei intrâ poros corporis impelluntur, cunei munus efficiunt, & motu quo concitantur illud frangunt, dividuntque. Sal actione caret, nisi Aquæ motu diluatur; hinc viguit illud axioma, *salia non agunt ni dissoluta*; vicissimque dici potest maximam vim liquidorum à salibus pendere. Odores, sapores, qui à nobis percipiuntur ex salium aculeis vim suam præcipuè desumunt. Sulphur seu oleum est principium flexile & ramosum, reliqua necens principia, mixtis unctuositatem, malleabilitatem, & inflammabilitatem concilians. Terra est principium porosum, scabrosum & inæquale, ad motum ferè ineptum, alia principia in suis poris excipiens, & matricis ad instar mixtorum productioni inserviens. Hæc sunt principia quibus corpus humanum constatur, & in quæ resolvitur. Os, Cartilago, Caro musculosa, Viscerum diversæ species, omnium generum fibrillæ, omnesque humores seu liquida quæ in harum partium solidarum contextus & canales perpetuò fluunt, continent hæc principia. Non solum corporis partes hisce principiis gaudent, verum ab eorum energiâ seu viribus, motus suos recipiunt, affectus patiuntur, proprietates intrinsecas conservant. Sanguis diversas Salis, Sulphuris, Terræ & Aquæ particulas ab alimentis mutuatur; ratione hujus diversitatis, & maxime propter varios salis aculeos blandè fermentescere cogitur: hinc eædem particulæ simul cum Aquâ permixtæ novam tenuitatem, mixtionem, colorem, odorem, & saporem in variis poris, seu glandulis sibi vindicant, ut succus Gastricus in Stomacho, Bilis in Hepate, Lympha in Glandulis Lymphaticis, Urina in Renibus &c. Ad illam metamorphosin parum aut nihil confert vis solidorum elastica; equidem vis illa nihil ferè efficit præter trusionis motum, quo liquores ex unâ parte, ad aliam citiùs perveniunt. Hinc sanguinis & omnium liquorum circulationes, secretiones & cæteræ hujusmodi operationes.

V.

OMNIA corpora, Sale, Sulphure, Aquâ & Terrâ componi, tanquàm principii, suadet ratio, probat Analysis, evincit tot experimentorum notitia. Plura sunt corpora, è quibus quædam aut nulla principia elici tantum possunt, ut v. g. Aurum & quædam mineralia, quorum principia adeò intricantur, ut ex iis erui nequeant, & ideo, vix destrui possint. Abstineas judicare illa principia non exsistere in misto, ex eo quod eorum separatio, aut extractio nulli arti cedat; effectus, proprietates, & munia, eorum probant præsentiam: judicium & ratio certò confirmant quod sensibus negatur. Unum quod-

que horumce principiorum in omnibus serè mistis diversum esse videtur ratione effectûs; hæc diversitas à variâ proportionē & quantitate eorundem dependet. Diversa textura quanquam dissimili facie, semper eadem agnoscit principia. Ab admixtis principiis si expediuntur mixta, perit forma, perit corpus, non pereunt materiâ. Viliora si quæ sint mista, iisdem constant principiis ac præciosissima: eadem partes oleosæ quæ in Cinnamomo gratissimo fragrant odore, in Cicutâ malè olent, pro diversis aliorum principiorum quantitate, miscendi modo, & aliis circumstantiis. Omnia principia ab invicem sic dependent, ut unum absque alio non valeat operari: non pungeret Sal, nisi ab Aquâ tanquàm à vehiculo moveretur: Aqua itidem Sale destituta, sic langueret in suis operationibus, ut in nobis sensus vix excitaretur: Oleum caretet omnino odore, sapore, & liquiditate, nisi Aquæ, & Salis particulis interciperetur: Sal, Sulphur, & Aqua terræ subsidio egent, ut vicissim duri corporis basim componant: Terra absque aliis principiis foret otiosa vel inanis. Non solum in ipsis Terræ visceribus eadem principia deprehenduntur, sed in Aërem elevantur particulæ, Lacuum, Salinæ, Oleosæ, Terræ quæ pro Aëris altitudine Orbis regione, Lacuum vicinâ &c. subtiliores evadunt. Hæ particulæ iteratis circulationibus, è Terrâ in Aërem, & ex Aëre in Terram nova mixtorum genera procreant: has generationes examinare est in parietinis, ubi salinæ concreciones fiunt. Habes exemplum in Terrâ apprimè calcinatâ. Lotâ & aliis principiis destituta, quæ temporis progressu iisdem imbuatur. Ex vaporibus, fumis, exhalationibus fiunt concreta v. g. fuligo caminorum, ex quâ Sal, Sulphur, Aqua & Terra iterum educuntur. Plantæ & alia alimenta quibus in cibum utitur homo, iisdem pollent principiis, & cum certò sit quod constemus quibus nutrimur, iurè ac meritò concludimus.

Ergo Sal, Sulphur, Aqua & Terra, Hominis principia.

DOMINI DOCTORES DISPUTATURI.

M. Nicolaus le Tellier.

M. Franciscus Bailly.

M. Antonius Geoffroy.

*M. Petrus Afforty Pharmacia
Professor.*

M. Andreas de la Leu;

*M. Joannes Franciscus Couchier, Chirurgia Professor
designatus.*

M. Antonius Le Moine.

*M. Joannes Baptista Mongin,
Chirurgia Gallica Professor
designatus Consiliarius,
Medicus Regis Ordinarius,
Aclius Præses.*

M. Claudius Antonius Renard.

Proponebat Parisiis, LUDOVICUS-MARIA POUSSE Parisinus, Baccalaureus Medicus, A. R. S. H. 1730. à sextâ ad meridiem.